



PERDANA LIBRARY
PERDANA LEADERSHIP FOUNDATION
NEWSPAPER CLIPPING

Newspaper	Berita Harian
Date	5/9/2011

Tragedi Noramfaizul jadi iktibar

Dr M mahu penganjur misi kemanusiaan di negara asing buat persediaan cukup

Oleh Badrul Kamal Zakaria
badrulkamal@bharian.com.my

KUALA LUMPUR: Tun Dr Mahathir Mohamad berkata, kejadian yang menimpa Allahyarham Noramfaizul Mohd Nor wajar dijadikan pengajaran dan iktibar oleh pihak yang ingin menganjurkan misi kemanusiaan terutama ke sesebuah negara yang bergolak.

Bekas Perdana Menteri juga menasihatkan mereka yang ingin menghantar bantuan ke negara asing, membuat persediaan yang secukupnya, khususnya aspek keselamatan, supaya tragedi sama tidak berulang.

"Somalia adalah sebuah negara yang kucar-kacir dan bahaya kerana kerajaan mereka sangat lemah sehingga tidak mampu menyediakan jaminan keselamatan kepada petugas misi bantuan kemanusiaan.

"Saya amat sedih dengan kejadian menimpa Allahyarham, kerana saya berharap orang kita akan dijaga dengan baik apabila sampai di sana (Somalia), tetapi ia menjadi sebaliknya," katanya ketika dite-

mui pada majlis rumah terbuka Aidilfitri di kediamannya di The Mines di sini, semalam.

Dr Mahathir berkata, penganjur misi kemanusiaan perlu membuat persediaan secukupnya jika ingin menghantar bantuan ke sesebuah negara yang bergolak kerana ia membabitkan keselamatan dan nyawa orang.

"Kita kalau nak tolong orang pun kena tengok dulu dan sentiasa berhati-hati... biarlah orang yang kita nak tolong itu pun sudi menerima bantuan kita. Selain itu, kita kena pastikan mereka juga turut menyediakan kawalan keselamatan kepada petugas kita.

"Kita kena ingat, walaupun kita ada jaket kalis peluru dan topi sekalipun, ia masih belum boleh jamin keselamatan nyawa kita kerana tempat itu (Somalia) sememangnya berbahaya sejak dari dulu lagi. Jadi, setiap petugas mesti berhati-hati pada setiap masa kerana ia sangat berbahaya.

"Kita sepatutnya belajar daripada kejadian dulu yang turut menyaksikan beberapa anggota tentera Malaysia yang menyertai misi pengamanan antarabangsa di Soma-



DR MAHATHIR dan Dr Siti Hasmah (kanan) bermesra dengan pengunjung pada majlis rumah terbuka di kediamannya di The Mines, semalam.

lia, terkorban," katanya.

Ditanya mengenai tindakan pemimpin pembangkang yang mendakwa bahawa misi bantuan kemanusiaan ke Somalia adalah propaganda kerajaan untuk mendapat publisiti, Dr Mahathir menyifatkan kenyataan seperti itu hanya akan dibuat oleh mereka yang berhati busuk.

"Itulah kerja pembangkang yang

tidak pernah berhenti membuat tohmahan terhadap setiap perkara yang kita buat, walaupun kerja itu adalah sangat baik dan mulia.

"Apa juga yang kita buat tidak pernah elok... orang seperti itu tidak tahu nak berterima kasih dan bersyukur, malah mereka juga sanggup jatuhkan maruah pejuang tanah air yang berjuang untuk kemerdekaan," katanya.